

Monsieur,

Ce que je vous escri, n'est point pour exiger, ni mesme pour attendre de vous le reciproque. Ce n'est asse^r si parmi tant de grandes occupations pres de Monseigneur nostre Maisre, vous prenez le loisir de lire ce petit mot de remerciement que je vous fay, pour les grandes obligations que mon beau-fils me tesmoigne devoir a vos bons offices pour son advancement, & au courtois acces qu'il recoit de vous aux occasions. Quand il s'en presentera quelqu'une pour luy donner moyen de pouvoir rendre a son Ex. quelque service plus signale, en un employ plus important, je me promets qu'il rencontrera toujours en vous la mesme volonte par le ramenteroir, & en la bonte de son Excel. l'inclination de le luy accorder. Si ses services & les miens n'ont pas encore beaucoup merite, le desir de le faire supplera a ce defect, & le temps advenir rendra tesmoignag de nostre fidelite. Nous pleurons icy les pertes de tant de braves hommes, & ce coup recent en la personne de ce jeune seigneur, qui promettoit tant. Cela nous fait redoubler nos vœux pour la conservation du chef sur tout, & des autres membres qui restent entiers, & pour l'issue de l'affaire commencée, afin que Dieu nous en ottorge tel succès, qu'en la gloire de son nom, nous puissions veoir la confusion de ses ennemis. Il y a long temps que je n'ay

eu l'honneur de veoir Madame de Zuilchem, pour ce qu'elle
a pris l'air des champs depuis quelques semaines, mais ma
femme a ce bien d'en entretenir Mesdames vos soeurs, &
apprendre des nouvelles de sa santé. Je prie Dieu qu'il
accroisse la vostre, & vous maintienne en toute prospérité.
Madame nostre Maistresse se porte fort bien à present, gra-
ces a Dieu. J'eu l'honneur hier de la veoir a la pour-
menade avec fort bon visage, & entièrement delivree de sa
toux. Son Excel. & Mesdames les belles soeurs & neveu,
ont fort pleuré ce neveu & cousin, Madame de Guillon
notamment, qui augmente par tels exemples ses apprehensions,
ausquelles il n'y a remede que de se soumettre a cette
grande providence, a laquelle de rechef je recommande
toute l'issue, & suis

Monsieur,

De La Haye le xxvij^e
Juillet 1632.

Or de tres-humble & plus-aff^{ect}
serviteur, Andre Rivet.

A Monsieur,

Monsieur de Zuilchem, Con-
seiller & Secrétaire de
Son Excellence. Au Camp.

2. Julij.
32.